

## გულბათ ჭავჭავაძე

უკვე ჩათავდა სოფლად რთველი და ყურძნის კრეფა,  
აზვავებული შემოდგომა ბელლებს ჩაბარდა.  
სტუმრებისათვის ლავაშებით დახურეს სეფა  
და ჭავჭავაძე გულბათი დასვეს თამადად.

დასვეს თამადად გოლიათი მსმელი კახელთა,  
დასვეს და დაჯდა, დაიმშვენა, სუფრას გახედა:  
ჩანდნენ ორ მწკრივად ჟღალ ჩოხებში ძველი მსმელები,  
ღვინო სწყუროდათ, ღვინის ეშხით ვერ ისვენებდნენ.

მან ჯერ უღვაში გადიგრიხა ყურებზე, უკან,  
მერე პირველმა წესისამებრ გატეხა ლუკმა,  
თასი ასწია, მიულოცა ლხინი თავადთა  
და აზარფემამ ფრინველივით გაინავარდა.

÷

სვეს უმოწყალოდ ღვინოები ცეცხლისმფრქვევლები,  
მერიქიფეებს აღარ შერჩათ ხელში ქვევრები.  
მოფარდაგულზე გაიშხვართნენ მსმელი კაცები,  
ლეკურებივით მოიქნის სველი ყანწები.

და როცა სუფრას აღარ შერჩა ერთი კაციცა,  
როცა ლავაშით დახურული სეფაც დაიქცა,  
როცა დაიმსხვრა სასმურები და დაილია, -  
მაშინ გულბათ ჭავჭავაძე გადაირია,  
გადაირია, როგორც ერთ დროს შედან ჭილაძე, ÷ ÷  
და იერიში მიიტანა წვრილ ჭინჭილაზე:

\* ჭავჭავაძე გულბათი - ღვინის სმით განთქმული ძველი კახელი თავადი.

÷ ÷ ჭილაძე შედანი - სახელგანთქმული ღვინისმსმელი ძველი სამეგრელოს მთავრის - დადიანის კარზე, მოხსენიებულია იტალიელი მოგზაურის არქანჯელო ლამბერტის «სამეგრელოს აღწერაში» (1654).

- კაცი ვშობილვარ, ეს ცხოვრება დამილევია  
და გაბმულ სმაში ჭინჭილით არ დამილევია.
- ბატონიშვილო, ეს ჭინჭილა გადაგრჩათ მარტო,  
ღვინით შეუვსეთ და მოართვით ჭინჭილა ბატონს.

შეტორტმანებულს ნახევარიც არ დაეცალა,  
წყენით წამოცდა: "ეს ოხერი რომ არ გათავდა!"  
სანთელს გახედა, მოეჩვენა ერთი ათადა,  
თვალთ დაუბნელდა, დაეკარგა მუხლებში ძალა,  
წაიბორძიკა, წაიფორხილ-წაიბანცალა  
და ნაცოხნარით გაბერილი, როგორც კამეჩი,

აზრდაკარგული გაიშვართა შუაღამეში.

ჭერი შეინძრა, იატაკმა გაიჭრიჭინა,  
თაიგულივით ხელში შერჩა ჭრელი ჭინჭილა.

÷

გაჩაღებოდა მაღვალაკი თვალი კახურში  
და სუფრის ბოლოს ხითხითებდა მთვრალი ბახუსი.  
თითქოს იტყოდა: "მასპინძელო, ეს რა კაცია,  
ქვევრებსა ნთქავდა და ჭინჭილამ ვით წააქცია!"

1942